



官常典第七百八十三卷

政事部名臣列傳十三

唐二蕭定

按唐書蕭瑀傳定字梅臣瑀曾孫以蔭起家陝州參軍事金城丞蒞事清挺代宗將幸華清遵慶表爲判官還調萬年主簿歷左右司郎中爲元載所惡外遷袁潤等六州刺史大曆中有司差天下刺史治最定與常州蕭復豪州張鎰爲第一而劾桑稼均賦稅業徠游口在鎰復右遷戶部侍郎太常卿朱泚反詭姓名爲張誕匿里中與蔣沈不浼於賊事平擢太子少師卒年七十七贈太子太師

柳子華

按唐書柳公綽傳子華公綽諸父也始辟嚴武劍南府累遷池州刺史代宗將幸華清宮先命完葺欲以子華爲京兆少尹尹惡其剛方沮解之遂爲昭應令檢校金部郎中修宮使設棘園於市徇邑中曰民有得華清宮瓦石材用投園中踰三日不還者死不終日已山積矣營辦略足宰相元載有別墅以奴主務自稱郎將怙勢縱暴租賦未嘗入官子華因奴入謁收付獄劾發宿罪杖殺之一邑

震伏載不敢怨遣更厚謝預知其終自爲墓銘子公器公度

蘇弁

按唐書蘇世長傳世長從孫弁字元容擢進士調奉天主簿德宗出狩而縣令計事在府官屬皆惶恐欲遁走弁曰昔肅宗幸靈武至新平安定二太守坐伏匿斬以徇諸君知之乎衆乃定車駕至儲侍畢給帝嘉之試火理司直朱泚平進監察御史擢累倉部郎中判度支案裴延齡死帝召弁見延英賜紫衣金魚以度支郎中副知度支事位郎中上知度支有副自弁始弁通學術吏事精明承延齡後平賦緩役略煩苛人賴其寬久之遷戶部侍郎判度支改太子詹事舊制詹事位在太常宗正卿下御史中丞竇參卑之徙班河南太原尹下弁造朝輒就舊著有司疑詰給曰我已白宰相復舊班殿中侍御史鄒儒立劾奏待罪金吾有詔原罪坐前以腐粟給邊貶汀州司戶參軍是時兄克爲贊善大夫冕京兆士曹參軍以弁故貶克永州冕信州司戶參軍克年老瞶不能視帝閱之聽還又有稱冕才者帝悔不用而克以老先還重追冕更問大臣昆弟可任者左右以王紹之兄紆韓臯之兄羣對帝乃擢紆右補闕羣考功員外郎冕遂復不用數年起弁爲滁州刺史卒弁聚書至二萬卷

手自讎定當時稱與祕府埒弁之判度支方大旱州縣有逋米斷貞元八年以前凡三百八十萬斛人亡數在弁奏請出以貸貧民至秋而償詔可當時譏其罔君云

崔縱

按唐書崔元暉傳元暉子璩璩子渙渙子縱繇協律郎三遷監察御史會詔擇令長授藍田令德化大行縣人立碑頌德渙之貶縱棄金部員外郎就養後爲汴西水陸運兩稅鹽鐵等使王師圍田悅之食詔縱餉四節度糧軍無乏德宗出奉天方鎮兵未至縱勸李懷光奔命悉軍財稱所須懷光兵疲久戰次河中遷延不進縱以金帛先渡曰濟者卽賜衆趨利爭西遂及奉天遷京兆尹上言懷光反覆不情宜備之及帝徙梁州追扈不及左右短縱素善懷光殆不來帝曰知縱者朕也非爾輩所及後數日至授御史大夫處大體不急細事獄訴付成僚屬而已自兵興內外官冗溢時議併省縱奏兵未息仕進者多緒在官則累遷有功而褒賞不可廢也比選集乃據闕留人怨望滋結朝廷頻詔錄勞而諸道叙優日廣若停減吏員非但承優者無官可敘亦恐序進者無路勝置矣詔可貞元元年天子郊見爲大禮使歲旱用屈縱擢裁文物儉而不陋除吏部侍郎尋爲河南尹時兵雖定民

彫耗縱治簡易蠲略細苛先是戍邊者道由洛儲餽取於民縱始令官辦使五家相保自占發斂以絕胥吏之私又引伊洛漑高仰通利里閭人甚宜之入爲太常卿封常山縣公卒年六十二贈吏部尙書諡曰忠初渙爲元載所抑縱訖載世不求聞達渙有嬖妾縱以母事之妾剛酷雖縱顯官而數笞詬然率妻子候顏色承養不懈時以爲難孫碣

馮伉

按唐書本傳伉魏州元城人徙貫京兆第五經宏辭調長安尉三遷膳部員外郎爲睦王等侍讀李抱真卒伉持節臨弔歸之帛不受又致京師伉上表固拒於是醴泉令缺宰相高選德宗曰前使澤潞不受幣者其人清可用也遂以授伉縣多鬻猾數犯法伉爲著諭蒙書十四篇大抵勸之務農進學而教以忠孝鄉鄉授之使轉相教督居七年韋渠牟薦爲給事中皇太子諸王侍讀對殿中賜金紫服進兵部侍郎出爲同州刺史以散騎常侍召領國子祭酒者再卒年六十六贈禮部尙書

顧少連

按唐書本傳少連字夷仲蘇州吳人舉進士尤爲禮部侍郎薛邕所器擢上第以拔萃補登封主簿

邑有虎孽民患之少連命塞陷穽獨移文獄神虎不爲害御史大夫于頔薦爲監察御史德宗幸奉天徒步詣謁授水部員外郎翰林學士再遷中書舍人闋十年以謹密稱嘗請徙先兆於洛帝重違去詔遣其子往且命中人護藏葬役歷吏部侍郎裴延齡方橫無敢忤者嘗與少連會田鎬第酒酷少連挺笏曰段秀實笏擊賊臣今吾笏將擊姦臣奮且前元友直在坐勸解之改京兆尹政尙寬簡不爲灼灼名先是京畿租賦薄厚不能一少連以法均之遷吏部尙書封本縣男徙兵部爲東都留守表禁苑及汝閑田募耕以便民閱武力利鎧仗號良吏卒年六十二贈尙書右僕射諡曰敬始少連攜少子師閔奔行在有詔同止翰林院車駕還授同州參軍

韋夏卿

正卿子璿

按唐書本傳夏卿字雲客京兆萬年人少邃於學善文辭火曆中與弟正卿同舉賢良方正皆策高等授高陵主簿累遷刑部員外郎時仍歲旱蝗詔以郎官宰畿甸授奉天令課第一改長安令轉吏部員外郎郎中擢給事中出爲常蘇二州刺史徐州節度使張建封疾甚召夏卿爲徐泗行軍司馬且代之未至而建封卒徐軍立其子愔爲留後召夏卿爲吏部侍郎時從弟執誼在翰林嘗受人金

有所干請密以金內夏卿懷中夏卿毀懷不受曰吾與爾賴先人遺德致位及此顧當是哉執誼大
慙轉京兆尹太子賓客檢校工部尙書爲東都留守辭疾改太子少保卒年六十四贈尙書左僕射
諡曰獻夏卿性通簡好古有遠韻談說多聞晚歲將罷歸署其居曰大隱洞與齊映穆贊弟員友
善雖同遊終年不見其喜愠撫孤姪恩踰己子爲政務通理不甚作條教所辟士如路隋張賈李景
儉等至宰相達官故世稱知人正卿子瓘字茂弘及進士第仕累中書舍人與李德裕善德裕任宰
相罕接士唯瓘往請無間也李宗閔惡之德裕罷貶爲明州長史會昌末累遷楚州刺史終桂管觀
察使

盧羣

按唐書本傳羣字載初系出范陽少學於垂山淮南陳少游聞其名奏署幕府已而薦諸朝李希烈
反以監察御史爲江西行營糧料使嗣曹王臯節度江西奏爲判官臯徙荆襄皆從其府以勁正聞
入爲侍御史郭子儀家與嬖人張昆弟訟財不平又言嬖人宅匿珍寶德宗促按之羣奏言子儀有
大勳德今所訟皆其家事且嬖人宅子儀昔畀之非子弟所宜言請赦勿問從之人謂羣識大體累

遷兵部郎中淮西吳少誠擅決司洧水溉田使者止之不奉詔命羣臨詰少誠曰是於人有利羣曰臣道貴順恭恪所以爲順也專命廢順雖利何有且怠於事上者固不能責其下矣少誠聽命羣又爲陳古今成敗事逆順禍福皆有效所以感動之少誠悚然旣置酒與賦詩又歌以慰之少誠感悅不敢桀以奉使稱旨遷檢校祕書監鄆滑節度行軍司馬姚南仲入朝卽以羣代節度羣嘗客於鄆質良田以耕至是則出券貸直以田歸其人卒年五十九贈工部尙書

韋倫

按唐書本傳倫系本京兆父光乘在開元天寶間爲朔方節度使倫以蔭調藍田尉幹力勤濟楊國忠署爲鑄錢內作使判官國忠多發州縣齊人令鼓鑄督非所習雖錘扶苛嚴愈無功倫請準直募匠代無聊之人繇是役用減鼓鑄多矣元宗晚節盛營宮室更介以爲欺倫閱實工員省費倍從帝入蜀以監察御史爲劍南節度行軍司馬置頓判官時中人衛卒多侵暴尤難治倫以清儉自將西人賴濟中宦疾之以讒貶衡州司戶參軍度支使第五琦薦倫才擢商州刺史荆襄道租庸使襄州裨將康楚元亂自稱東楚義王刺史王政棄城遁賊南襲江陵絕漢沔餉道倫調兵屯鄧州厚撫降

賊寇益急乃擊禽楚元以獻收租庸二百萬緡召爲衛尉卿俄兼靈隴二州刺史乾元中襄州亂詔倫爲山南東道節度使而李輔國方恣橫倫不肯謁憾之中罷爲秦州刺史吐蕃党項歲入邊倫兵寡數格虜敗貶巴州長史徙務川尉代宗立連拜忠台饒三州刺史宦者呂太一反嶺南詔拜倫韶州刺史韶連郴都團練使爲太一反間貶信州司馬斥棄十年客豫章德宗嗣位選使絕域者擢倫太常少卿充和吐蕃使倫至諭天子威德贊普順悅乃入獻還進太常卿兼御史大夫再使如旨倫處朝數論政得失宰相盧杞惡之改太子少保從狩奉天及杞敗關播罷爲刑部尙書倫在朝堂流涕曰宰相無狀使天子至此不失爲尙書後何勸聞者憚其公帝後欲復用杞爲刺史倫苦諫言懇至到帝納之進太子少師郢國公致仕時李楚琳以僕射兼衛尉卿李忠誠以尙書兼少府監倫言楚琳逆節忠誠戎醜不當寵以官又請爲義倉以捍無年擇賢者任帝左右謂吐蕃豺虎野心不可事信約宜謹備邊帝善其言厚禮之居家以孝慈稱卒年八十三贈揚州都督諡曰肅

薛珏

子存慶

按唐書本傳珏字溫如河中寶鼎人以蔭爲懿德太子廟令累遷乾陵臺令歲中以清白聞課第一

改昭應令人請立石紀德珏因讓遷楚州刺史初州有營田宰相遙領使而刺史得專達俸及它給百餘萬田官數百歲以優得遷別戶三千備刺史廨役珏至悉條去之租入贏異時觀察使惡其繁誣以罪左授峽州刺史建中初德宗命使者分諸道察官吏升黜焉而李承狀珏之簡趙贊言其廉盧翰稱其肅書參聞於是拜中散大夫賜金紫劉元佐表兼汴宋行軍司馬李希烈棄汴州走卽拜珏刺史遷河南尹入爲司農卿是時詔舉堪刺史縣令者且百人延問人間疾苦吏得失取尤通達者什二宰相欲校以文詞珏曰求良吏不可責文學宜以上愛人之本爲心也宰相多其計所用皆稱職爲京兆尹司農供三宮畜茹三十車不足請市京兆是時韋彤爲萬年令珏使彤禁鬻賣民苦之德宗怒奪珏彤帝疑下情不達因詔延英坐日許百司長官二員言闕失謂之巡對珏剛嚴曉法律勤身以勸下然苛察無經術大體坐善寶參改太子賓客出爲嶺南觀察使卒年七十四贈工部尙書子存慶字嗣德貌偉岸及進士第歷御史尙書郎五遷給事中與韋弘景封駁詔書時稱其直劉總以幽州歸穆宗謂宰相曰必用薛存慶可以宣朕意對延英一刻遣之至鎮州疽發於背卒贈吏部侍郎

崔漢衡

按唐書本傳漢衡博州博平人沈懿博厚善與人交始爲費令滑州節度使令狐彰表掌書記大
六年以檢校禮部員外郎爲和蕃副使還遷右司郎中建中二年吐蕃請盟擢殿中少監爲和蕃使
與其使區頰贊俱來約盟改鴻臚卿持節送區頰贊歸遂定盟清水德宗幸奉天吐蕃以兵佐渾瑊
敗賊武功轉祕書監俄拜上都留守兵部尙書東都淄青魏博賑給宣慰使又使幽州還命稱旨貞
元三年豫吐蕃盟平涼被執鹵將殺之因夷言謂之曰我善結贊無殺我而漢衡誠信素著鹵亦尊
重故至河州得還明年出爲晉慈隰觀察使卒贈尙書左僕射

蔣沆

按唐書蔣欽緒傳欽緒子沆亦專潔博學少有名以孝廉授洛陽尉遷監察御史與兄演溶弟清俱
爲才更有名天寶間始河南尹韓朝宗裴迴嘗委訊覆檢句而處事平剖斷精允羣僚莫能望也乾
元中歷陸渾蓋厓咸陽高陵四縣令美政流行長老紀焉郭子儀軍出其縣敕麾下曰蔣沆賢令供
億當有素得蔬飯足矣毋撓其清也遷長安令以刑部郎中兼侍御史領渭橋運出納使元載持政

守道士類不遷沈以故滯郎位不得調常袞代相聞士議恨沈屈故擢御史中丞東都副留守再遷大理卿持法明審號稱職德宗出奉天沈奔行在爲賊所拘欲誘署僞職沈絕食不應命竄伏里中不復見京師平乃出擢右散騎常侍卒年七十四贈工部尙書

奚陟

按唐書本傳陟字殷卿其先自譙毫西徙故爲京兆人少篤志通羣書大曆末擢進士文辭清麗科授弘文館校書郎德宗立諫議大夫崔河圖持節使吐蕃表陟自副以親老辭不拜楊炎輔政召授左拾遺居親喪毀瘠過禮朱泚反走問道及車駕於興元拜起居郎翰林學士不就職賊平改太子司議郎歷金部吏部員外會左右丞缺轉左司郎中貞元八年遷中書舍人於是江南淮西皆大水詔陟勞問循慰所至人人便安中書吏倚宰相勢常姑息獨陟遇之無假借先是右省雜給貤職田稟主事與拾遺等陟以奉稍爲率由是吏官有差中書令李晟有紙筆猥料積於省它日以遺舍人而雜事舍人常私有之陟均舍寮無厚薄雖細務皆身親其勞久益強力人以爲難遷刑部侍郎京兆尹李充有美政裴延齡惡之誣劾充比陸贄數遺金帛當抵罪又乾沒京兆錢六十八萬緡請赴

比部鉤校時郎中崔元翰怨贊揣延齡指逮繫撈掠甚急內以險文陟持平無所上下具獄上且言京兆錢給縣館傳餘以度支符用度略盡充既免元翰不得意以恚死陟尋知吏部選事遷侍郎銓綜平允時謂與李朝隱略等不能隨發清明如裴行儉盧從愿也十五年病癰帝遣醫療視敕曰陟賢臣爲我善治之卒年五十五贈禮部尙書陟少自砥厲著名節常薦權德輿爲起居舍人知制誥楊於陵爲郎中其後皆有名子敬元

崔衍

按唐書本傳衍字著深州安平人父倫字敘居父喪跣護柩行千里道路爲流涕廬塚彌年服除及進士第歷吏部員外郎安祿山反陷於賊不汙僞官使子弟間表賊事賊平下遷晉州長史李齊物訟其忠授長安令封武邑縣男寶應二年以右庶子使吐蕃鹵背約留二歲執倫至涇州逼爲書約城中降倫不從更囚邏娑城闔六歲終不屈乃許還代宗見之爲感動嗚咽卽具陳鹵情僞山川險易指畫帝前人服其詳遷尙書左丞以疾改太子賓客卒年七十一贈工部尙書諡曰敬衍天寶末擢明經調富平尉繼母李不慈倫自吐蕃歸李敝衣以見問故曰衍不吾給倫怒召衍將袒而鞭之

衍涕泣無所陳倫弟殷趨白衍所稟舉送夫人所尙何云倫悟繇是譖無入調清源令勸民力田懷
附流亡觀察使馬燧表其能徙美原父卒事李益謹歲爲李子邵償負不勝計故官刺史妻子僅免
饑寒歷蘇虢二州虢居陝華間而賦數倍入衍白太重裴延齡領度支方聚斂私謂衍前刺史無發
明公當止衍不聽復奏州部多巖田又郵傳劇道屬歲無秋民舉流亡不蠲減租額人無生理臣見
長吏之患在因循不以聞不患陛下不憂卹也患申請不實不患朝廷不矜貸也陛下拔臣大州寧
欲視民困而顧望不言哉德宗公其言爲詔度支減賦遷宣歙池觀察使簡靜爲百姓所懷幕府奏
聘皆有名士後多顯於時卒年六十九贈工部尙書衍儉約畏法室無妾媵祿稍周所親族葬埋嫁
娶倚以濟者數十家及卒不能藏喪表諸朝賜賻帛三百段米粟稱之先是天下以進奉結主恩州
藏耗竭韋臯劉贊裴肅爲之倡贊死衍代之舊貢金錫凡十八品皆倍直市於州民匱多逃去衍至
蠲革之居十年畜用度府庫充衍及穆贊代州以錢四十萬緡假民賦故雖旱人不流捐由衍蓄積
有素也路應爲觀察使以衍有惠在民言狀元和元年詔書褒美賜一子官云諡曰懿

任迪簡

按唐書本傳迪簡京兆萬年人擢進士第天德李景略表佐其軍嘗宴客而行酒者誤進醢景略用法嚴迪簡不忍其死飲爲醕徐以它辭請易之歸嶠血不以聞軍中悅其長者景略卒舉軍請爲帥監軍使拘迪簡不聽衆大呼破戶出之德宗遣使者察變具得所以然乃授豐州刺史天德軍使由殿中侍御史授兼大夫散騎常侍入爲太常少卿太子左庶子張茂昭以易定歸擢迪簡行軍司馬代之大將楊伯玉據牙不納衆殺之別將張佐元復叛迪簡斬以徇乃入以檢校工部尙書爲節度使承茂昭奢縱後公私屈蹙欲饗士無所給至與下同糲食身居戟戶踰月軍中感其公請安臥內迪簡乃許三年上下完充以疾入除工部侍郎不能朝改太子賓客卒贈刑部尙書諡曰襄

劉伯芻

子寬夫

按唐書本傳伯芻字素芝兵部侍郎迺之子行脩謹淮南杜佑奏署節度府判官府罷召拜右補闕遷主客員外郎數過友家飲曠爲韋執誼陰劾貶虔州參軍久乃除考工員外郎裴迺待之善擢累給事中李吉甫當國而迺卒不加贈伯芻爲申理乃贈太子少傅或言其妻迺從母也吉甫欲按之求補虢州刺史稍遷刑部侍郎左散騎常侍卒贈工部尙書伯芻風度高嚴善談諠而動與時適論

者少之子寬夫寶曆中爲監察御史奏言以王府官攝祠位輕非嚴恭意請以尙書省東宮三品若左右丞侍郎通攝俄轉左補闕陳帖注浮屠書因供奉僧以聞除濠州刺史寬夫劾狀敬宗怒謂宰相曰帖不繇僧得州諫臣安受此言寬夫曰衆劾帖獨臣草狀應伏誅推言所從恐累國體帝讜其言釋之子允章

李建
子訥

按唐書李遜傳遜弟建字杓直與兄俱客荊州鄉人爭鬪不詣府而詣建平決無頗母憐其孝每字之曰倭子勸吾食吾輒飽進藥吾意其瘳貞元中補校書郎德宗思得文學者或以建聞帝問左右宰相鄭珣瑜曰臣爲吏部時當補校書者八人宅皆藉貴勢以請建獨無有帝喜擢左拾遺翰林學士順宗立李師古以兵侵曹州建作詔諭還之詞不假借王叔文欲更之建不可左除太子詹事改殿中侍御史以兵部郎中知制誥宰相有竄定稿詔者亟請解職除京兆少尹會遜被讒建申治之出爲澧州刺史召拜刑部侍郎卒贈工部尙書初建爲學時家苦貧兄造知其賢爲營丐使成就之故遜建皆舉進士後雖通顯未嘗置垣屋以清儉聞建子訥字敦止及進士第遷累中書舍人爲浙

東觀察使性疏卞遇士不以禮爲下所逐貶朗州刺史召爲河南尹時久雨洛暴漲訥行水魏王堤懼漂泊疾馳去水遂大毀民廬議者薄其材初訥居與宰相楊接收欲市訥冗舍以廣第訥叱曰先人舊廬爲權貴優笑地耶凡三爲華州刺史歷兵部尙書以太子太傅卒遣命葬不請鹵簿避贈諡詔聽

李元素

按唐書本傳元素字太朴邠國公密裔孫仕爲御史東都留守杜亞惡大將令狐運會盜劫輸絹於洛北運適與其下畋近郊亞疑而訊之幕府穆員張弘靖按鞫無狀亞怒更以愛將武金掠服之死者甚衆亞請斥運醜土詔監察御史楊寧覆驗事皆不讎亞怒劾寧罔上寧抵罪又自以不失盜爲功因必其怒傳致而周內之若不可翻者德宗信不疑宰相難之詔元素與刑部員外郎崔從質大理司直盧士瞻馳按亞迎以獄告元素徐察其冤悉縱所囚以還亞大驚復劾元素失有罪比元素還帝已怒奏獄未畢帝曰出元素曰臣言有所未盡帝曰第去元素曰臣以御史按獄知冤不得盡辭是無容復見陛下帝意解卽道運冤狀帝感寤曰非卿孰能辨之然運猶以擅捕人得罪流歸州